



**Submisaun ba Komisaun B Parlamentu Nasional kona-  
ba Proposta Lei Orsamentu Jeral Estadu 2025 ba  
Polícia Nacional de Timor-Leste (PNTL)**

**Hali ba Dame [HABADA]**  
Monitorizasaun no Advokasia ba Seguransa Komunitária  
Rua: Tali Laran, Comoro, Dom Aleixo, Dili  
Website: [www.habada.org](http://www.habada.org)  
Email: [abelamaral75@gmail.com](mailto:abelamaral75@gmail.com)  
+670 7745 4324

Dili, 21 Outobru 2024

## Introdusaun

Iha loron 30 Setembru, Konsellu Ministru aprova Proposta Orsamentu Jeral Estadu (OJE) 2025 ho montante biliaun US\$2.6 no submete ona ba Parlamentu Nasional iha loron 1 Outobru 2024. Prosesu tomak hahu hosi semináriu, audiênsia, diskusaun to'o aprovasaun final global sei ramata iha loron 27 Novembru 2024<sup>1</sup>. Partikularmentu ba PNTL, orsamentu ne'e atu finansia programa seguransa nasional, dezvoltimentu institusional no inkluzoan sosial. Dezafiu prinsipal ne'ebe PNTL hasoru maka atu garante katak fundu sira ne'e aloka ho efektivu hodi hadi'a seguransa interna, formasaun rekursu umanu no infraestrutur, iha kontestu dezafiu seguransa ne'ebe mosu, hanesan krime organizadu no ameasa sibernética. Nune'e liu hosi submisaun ida ne'e hakarak fahe ami nia observasaun sira kona-ba Proposta OJE 2025 ba PNTL ba deputadu sira Komisaun B Parlamentu Nasional República Demokrátika Timor-Leste nian.

## Proposta OJE 2025 ba PNTL

Iha Proposta OJE 2025 PNTL propoin nia orsamentu ho valor US\$46,420,340 hodi finansia programa sira, seguransa nasional ho nia orsamentu US\$43,492,690, funsionamentu no dezvoltimentu institusional US\$2,897,740, no inkluzoan sosial ho nia orsamentu US\$30,000<sup>2</sup>.

Programa	Valor (US\$)
<b>Seguransa Nasional</b>	<b>43,492,690</b>
Subprograma Operasaun Seguransa Interna	2,380,774
Subprograma Formasaun no Dezvoltimentu Rekursu Umanu PNTL	38,687,530
Subprograma Jestaun Equipamentu no Infraestrutur	254,000
Subprograma Alimentasaun no Rações Kombates Operasional ba PNTL	484,000
Subprograma Jestaun Seguransa Terrestre no Kosteira Timor-Leste	314,830
Subprograma Polisia Komunitária	921,496
Subprograma Prevensaun Kriminal, Servisu Investigasaun no Informasaun	170,000
Subprograma Vijilansia no Prevensaun Krime iha Tasi (Maritima)	280,060
<b>Programa Funsionamentu no Dezvoltimentu Institusional</b>	<b>2,897,740</b>
Subprograma Dezvoltimentu Institusional	2,897,740
<b>Programa Inkluzoan Sosial</b>	<b>30,000</b>
Subprograma Implementasaun NAP-GBV	30,000
<b>TOTAL</b>	<b>46,420,430</b>

Fonte: Proposta OJE 2025

Hosi programa sira temi liu daudauk ne'e, tuir livru OJE 2025 orsamentu refere fahe ka aloka ba kategoria sira hanesan Salariu no Vensimentu US\$39,924,528, Bens no Servisu US\$6,354,902 no Transferensia Pública ho valor US\$141,000.

<sup>1</sup> Kalendarium Apresiasaun Proposta Lei ba Orsamentu Jeral Estadu ba tinan 2025. Asesu iha ne'e: <https://timor-leste.gov.tl/?p=40116&lang=tp>

<sup>2</sup> Livro OGE 2025. Desenvolvimento Orcamentais Estrutura por Programas. Pajina 167.

## Observasaun sira

### 1. Seguransa nasional

Komponente boot liu hosi orsamentu PNTL aloka ba programa Seguransa Nasional, ho total US\$43,492,690. Ida-ne'e inklui subprograma esensial sira hanesan Operasaun sira Seguransa Interna nian (\$2,380,774) no Jestaun Seguransa Terrestre no Kosteira nian (\$314,830). Enkuantu montante sira-ne'e substansial, dezafiu atual maka efikásia distribuisaun rekursu sira hodi prevene no responde ba insidente sira seguransa nian iha área urbana no rural sira.

PNTL infrenta kestaun sira hanesan aumentu krime organizadu no instabilidade rejional. Oportunidade iha abilidade atu hametin koordinasaun entre unidade polísia sira, investe liu-tan iha formasaun especializada iha operasaun anti-terrorizmu no kombate tráfico umanu. Asuntu kritiku seluk maka vijilánsia tasi-ibun, maski iha orsamentu US\$280,060, sei la suficiente atu monitoriza Timor-Leste nia área kosteira ne'ebe luan tebes.

### 2. Formasaun no dezvoltimentu ba rekursu umanu

Subprograma formasaun no dezvoltimentu rekursu umanu PNTL nian hetan orsamentu signifkante hamutuk US\$38,687,530. Maski nune'e, US\$80,000 deit maka aloka ba atividade formasaun akadêmiku no tékniku polisial, no maioria ba saláriu no vensimentu. Tanba ne'e, formasaun no dezvoltimentu rekursu umanu iha PNTL kontinua sai dezafiu hodi hatan ba nesesidade spesífiku forsa seguransa nian hanesan kombate krime sibernetiku, investigasaun kriminal modernu no hametin polisiamentu komunitáriu.

Nune'e, ami sujere tenke investe iha formasaun no dezvoltimentu rekursu umanu iha área spesífiku sira no tenke adapta ba realidade teknolojia modernu, tanba krime aumenta ligasaun ba utilizaun teknolojia. Oportunidade seluk aproveita liuhosi programa kooperasaun ho parseiru internasional sira, ho objetivu atu forma ofisial sira ho abilidade sira iha teknolojia informasaun no siberseguransa. Iha ne'ebe área sira ne'e seidauk hetan atensaun dí'ak iha dezvoltimentu forsa polísia nian.

### 3. Infraestrutura no ekipamentu

Ho orsamentu US\$254,000 ne'ebe aloka ba jestaun ekipamentu no infraestrutura, iha foku evidente ba hadi'ak PNTL nia fasilidade fíziku no operacional. Maski nune'e, dezafiu hosi infraestrutura ne'ebe la adekuaudu persiste iha área remota sira, hodi difikulta abilidade polísia nian atu responde lalais no efetivu. Ekipamentu sira hanesan veikulu no teknolojia sira vijilánsia nian mós menus hosi nesesidade sira, ne'ebe difikulta dezempeñu hosi forsa polísia sira iha rejiaun sira ne'ebe susar atu asesu. Oportunidade ba melloramentu governu preziza investe iha infraestrutura seguransa nian no dezenvolve sistema vijilánsia avansadu no rekursu lojístiku sira hodi apoia operasaun aplikasaun lei nian iha teritóriu tomak.

#### 4. Polísia komunitária

Subprograma polísia komunitária, ho orsamentu US\$921,496, hala'o papel krusial hodi harii konfiansa entre PNTL no comunidade lokal sira. Maibe, dezafiu maka habelar programa ida-ne'e nia alkanse ba área rural sira no asegura katak ida-ne'e rezolve ho adekuaudu preokupasaun sira seguransa lokal nian hanesan violénsia doméstika, disputa sira no dezastre natural sira. Oportunidade ba hadi'ak iha implementasaun estratéjia sira ne'ebe envolve ativu liu comunidade sira, treinu ajente comunidade lokal sira no hametin mekanizmu mediasaun konfliktu. Formasaun polísia nian kona-ba rezolusaun konfliktu no intervensaun komunitária bele mós habelar, hodi asegura aprosimsaun preventiva duke reativa ba krize seguransa nian.

#### 5. Prevensaun no investigasaun sira krime nian

Subprograma servisu prevensaun krime no investigasaun simu US\$170,000, montante ne'ebe modestu kompara ho subprograma sira seluk. Ida-ne'e maka dezafiu significativu ida, bainhira konsidera aumentu iha krime organizadu no forma foun sira krime nian, hanesan krime sibernetiku no tráfico droga. Orsamentu limitadu, limita PNTL nia kapasidade atu investiga no prevene krime sira ho efetivu. Atu ultrapasa dezafiu sira ne'e, presiza investe no hadi'a PNTL nia dezempeñu liuhosi moderniza métodu investigasaun no introdus teknolojia foun hodi facilita prosesu investigasaun. Uza *software* análise krime nian, artifisial inteligéncia hodi halo predisaun ba tendénsia krime nian, no baze-dadus integradu sira bele hadi'a polísia nia resposta.

#### 6. Inkluzsaun sosial no polítika sira jéneru nian

Inkluzsaun sosial, ho de'it orsamentu US\$30,000, representa pontu fraku ida hosi OGE 2025 ba PNTL. Montante ne'e destina ba implementasaun Planu Asaun Nasional ba Violénsia Bazeia ba Jéneru (PAN-VBJ), tópiku krusial ida ba seguransa no bem-estar sosial iha Timor-Leste. Dezafiu ne'e evidente: orsamentu atual la sufisiente atu implementa polítika nasional ida hodi kombat violénsia bazeia ba jéneru ho efetivu.

Ami sujere aumenta finansiamentu ba programa inkluzsaun sosial no jéneru, hametin parseria ho organizasaun sociedade sivil no ajénsia internacional sira. Kolaborasaun sira ne'e bele ajuda habelar alkanse polítika sira atu proteje feto no labarik sira, liuliu iha área rural sira ne'ebe violénsia bazeia ba jéneru prevalente liu.

### **Konkluzsaun**

Proposta OGE 2025 ba PNTL apresenta planu abranjente ida atu hadi'a seguransa nasional no dezvoltamentu institucional, maibe hasoru dezafiu substansial iha termu alokasaun rekursu no efikásia operasaun sira. Futuru PNTL nian depende ba ninia abilidade atu adapta ba ameasa modernu sira, hanesan krime sibernetiku, no hadi'a infraestrutura no formasaun ba ninia ofisial

sira. Aumentu investimentu iha teknolojia modernu sira, formasaun no parseria ho entidade internasional sira nu'udar oportunidade sira ne'ebe bele ajuda hametin seguransa no estabilidade iha Timor-Leste iha tinan hirak oin mai.

### **Rekomendasaun sira**

1. Aumenta investimentu iha teknolojia no formasaun hodi prioritiza modernizasaun sistema vijilánsia no investigasaun, ho foku espesial ba siberseguransa, uza teknolojia avansadu no *software* análise dados.
2. Hametin formasaun kontínua no espesializada iha implementa programa formasaun kontínua ba ajente PNTL sira, ho foku espesífiku ba téknika polisiamentu foun, rezolusaun konfliktu no jestaun krize.
3. Dezenvolve parseria internasionl sira hodi estabese kolaborasaun ho forsa seguransa sira hosi nasaun seluk troka koñesimentu, formasaun no rekursu sira, ho objetivu atu hasa'e kapasidade resposta PNTL nian ba krime kompleksu no organizadu sira.
4. Habelar programa polisiamentu komunitáriu hodi intensifika esforsu atu implementa programa polisiamentu komunitária iha area rural, hodi promove konfiansa entre PNTL no comunidade lokal sira.
5. Hasa'e finansiamentu ba inklusaun sosial hodi dedika rekursu barak liu-tan ba Programa Nasional Asaun ba Violénsia Bazeia ba Jéneru, hodi garante katak PNTL iha ferramenta no formasaun ne'ebe adekuaudu hodi rezolve kestaun jéneru ho efetivu.

Obrigadu wa'in ba ita-bo'ot sira nia atensaun no konsiderasaun tomak. Hakarak informasaun adisional halo favor kontaktu:

### **Abel Amaral**

Diretor Ezekutivu

Rua: Tali Laran, Comoro, Dom Aleixo, Díli, Timor-Leste

Website: [www.habada.org](http://www.habada.org)

Email: [abelamaral75@gmail.com](mailto:abelamaral75@gmail.com)

(+670) 7745 4324